

Tema: LA NOSTRA SAGGEZZA DI ANZIANI

(versione dialettale, premiata)

Ul fiurín giald

Smagett da fiuu restaat indré  
puus al mürett dal mè giardín,  
sparmii dai culp da ranza che ha taiaat ul fen  
dal praa da prèss.

Salvaat anca lü  
dai sass che sbötta fö par caas dal mürr,  
quel fiurín giald da là dal mè cancell  
l'ha sfidaat intemperii tütta la stagion,  
da la tempesta al suu che pica giò.

Fresch da rosàda a la matín,  
öcc seraat la sira prim da nòcc,  
minüdrü cume i altri stess da lü.  
Hu mai savü 'l sò nom, g'hu mia pensaa,  
ma lü l'è sempru lí, drizz:  
e già sem in autün.

Ammò adess l'è un viavai d'avicc  
a tiragh fö tütta quel che 'l dev 'vegh denta  
quand gh'è pü in gír tant da catà scià.  
E lü al paar vèrdas, ul fiurín giald,  
par cuntentà i avicc.  
Rivarà la prüfina a fagh piegà giò 'l cò.

Sa posarà l'ültima farfàla  
che cerca ammò profüm,  
ma la sarà svelta a volà via.  
Lee, mí e i avicc;  
d'altri, nissün l'ha mai guardaa  
ul fiurín giald.  
Ma ul meer dal invernu al sarà dulz.

XI. 2006

Sig